

四庫全書

子部

欽定四庫全書

子部
駢志卷十

詳校官中書

臣張姚成

主事

臣祁韻士覆勘

總校官進士

臣朱鈐

校對官主事

臣張慎和

謄錄監生

臣林鴻瑛

欽定四庫全書

駢志卷十

戊部下

張平子造地動儀

陶弘景造渾天象

後漢書張衡字平子造候風地動儀以精銅鑄成員

徑八尺合蓋隆起形似酒尊飾以篆文山龜鳥獸之

明 陳禹謨 撰

形中有都柱傍行八道施闕發機外有八龍首銜銅
丸下有蟾蜍張口承之其牙機巧制皆隱在尊中覆
蓋周密無際如有地動尊則振龍機發吐丸而蟾蜍
銜之振聲激揚伺者因此覺知雖一龍發機而七首
不動尋其方面乃知震之所在驗之以事合契若神
自書典所記未之有也嘗一龍機發而地不覺動京
師學者咸怪其無徵後數日驛至果地震隴西于是
皆服其妙

南史陶弘景造渾天象高三尺許地居中央天轉而地不動以機動之悉與天相會云 又舊唐書李淳風造渾天儀以銅為之表裏三重下據準基狀如十字末樹龜足以張四表焉第一儀名曰六合儀有天經雙規渾緯規金常規相結于四極之內備二十八宿十干十二辰經緯三百六十五度第二名三辰儀圓徑八尺有瘠玦規道月遊天宿矩度七曜所行並備于此轉于六合之內第三名四遊儀玄樞為軸以

連結玉衡遊筭而貫約規矩又玄樞北樹北辰南距地軸傍轉于內又玉衡在玄樞之間而南北遊仰以觀天之辰宿下以識器之晷度時稱其妙

客星掩帝座

客星犯天子

幽明錄漢武帝嘗微行造主人家仍留宿夜與主婢卧有一書生亦寄宿善天文忽見客星將掩帝座甚逼書生驚呼咄咄不覺聲高又見一男子操刀將入

戶聞書生聲急遂縮走客星應時而退如此者數過
帝異而問之書生具說所見帝乃悟曰必此人婿也
將欲肆兇惡於朕乃語主人召集期門羽林擒奴問
而款服乃誅之帝嘆曰斯益天啟書生以扶祐朕躬
乃厚賜書生

會稽典錄嚴遵字子陵與世祖俱受業長安建武五
年下詔徵遵設樂陽明殿命宴會暮留宿遵以足荷
上其夜客星犯天子宿明旦太史以聞上曰此無異

也昨夜與嚴子陵俱卧耳

吹笛止雨

吹律煖谷

周穆王時天下連雨三月穆王乃吹笛其雨遂止也
劉向別錄方士傳言鄒衍在燕燕有谷地美而寒不
生穀鄒子居之吹律而溫氣至而穀生今名黍谷

引氣飛雪

即席為炎

拾遺記周靈王登昆昭之臺忽見二人乘雲而至一人先唱能為雪霜引氣一噴則雲起雪飛坐者皆凜然宮中池井堅冰可琢

又云周靈王冬設狐腋素裘紫罷文褙罷褙是西域所獻也施於臺上坐者皆溫又有一人唱能使即席為炎乃以指彈席上而暄風入室裘褙皆棄於臺上祈禱分風

動搖起雨

荊州記宮亭湖廟神甚有靈驗塗旅經過無不祈禱
能使湖中分風而帆南北

又云南康有平湖湖中扁底浮在湖中動搖便起風
雨

喫酒

漱水

邵氏家傳邵信臣為少府南陽遭火焚數萬人信臣
時在丞相匡衡坐心動含酒東向喫之遭火處見雲

西北來冥晦大雨以滅火雨酒香 又後漢書郭憲
從駕喫酒厭齊國火 神僊傳成武丁于周昕坐喫
酒救臨武火

後漢書樊英隱于壺山嘗有暴風從西方起英謂學
者曰成都市火甚盛因含水西向嚙之乃令記其時
日客後有從蜀來云是日大火有黑雲從東起須臾
大雨火遂得滅

藥已滅成都之火雨皆酒臭

金史卷之八十二
澄公滅幽州之火雨有酒氣

神僊傳藥已為尚書正朝大會已後到又飲酒西南
嚙之詔問謝曰臣本縣成都市失火臣故因酒為雨
以滅火後驛書問成都果然正旦失火有雨從東北
來乃息雨皆酒臭

晉書佛圖澄嘗與石季龍升中臺忽曰幽州當火災
乃取酒嚙之曰救已得矣後遣驗之云是日火起西
南驟雨滅之雨亦頗有酒氣

市中耗瓜

坐上種瓜

搜神記徐光常行幻術于市里從人乞瓜其主弗與便從索辦種之俄而瓜生蔓延成花實乃取食之因賜觀者鬻者反視所賣皆耗矣

續僊傳馬湘有道術嘗于江南刺史馬植坐上冬月以酒杯盛土種瓜須臾引蔓花實食之甚美

許元長致榴

董元素致柑

劇談錄唐武宗時術士金陵許元長善變幻武宗謂之曰先朝明崇儼取羅浮山柑子萬里往來止有旬日東都當進石榴時已熟矣卿今日當致十顆元長奉詔以出及旦寢殿始開金盤貯石榴致于御榻俄有使奉進亦以所失之數上聞

異聞集唐宣宗朝有術者董元素自江南來上召見與語曰聞君頗有神術今南中柑橘正熟卿能致之

否元素對曰請安一合于御榻前數刻時有微風入簾元素乃啟其合柑子滿其中奏曰此江陵枝江縣柑也遠處恐遲上嘗之驚歎

黃公能制虎後為虎所殺

長房能答鬼後為鬼所殺

西京雜記東海人黃公能制龍御虎佩赤金刀以絳繒束髮立興雲霧坐成山河及衰老不能復行其術秦末有白虎見於東海黃公乃以赤刀往厭之術既

不行遂為虎所殺

後漢費長房遇老翁為作符曰以此主地上鬼神遂能鞭笞百鬼及驅使社公或在他坐獨自恚怒人問其故曰吾責鬼魅之犯法者耳後失其符為衆鬼所殺

豢龍

咒龍

中朝故事古有豢龍氏長安有豢龍戶觀水即知龍

色其有無悉知之懿皇朝龍戶上言龍池中走失兩
條往關東尋訪數十日東都魏王池中見之取而歸
關經華州時李訥為華州刺史大以為虛妄命就公
俯視之則于一小瓶子中倒于盆內乃二細鰕魚也
訥怒目曰何以為驗對曰驗非難也請鑿穴尺許注
水其間收鰕投水相趁旋轉尾觸穴四隅隨觸而陷
水亦暴漲逡巡穴已闊數尺其人諮訥云恐穴更廣
即難制也遂搦入瓶中訥方奇之厚贈錢帛携歸輦

下

抱朴子西域方士能神呪者臨淵禹步吹氣龍即出
浮其初出乃長十數丈于是方士更吹之一吹則龍
輒一縮至長數寸掇取著壺中或有四五龍以少水
養之物塞壺口間有旱處便膏龍往賣之一龍直數
十斤金舉國會飲以雇之直畢乃發壺出一龍著淵
潭之中因復禹步吹之輒一吹一出長數十丈須臾
雲雨四集

沉符蛟死

施符蛇死

潯陽記潯陽城東門通大橋常有蛟為百姓害董奉
疏符沉水中少間見一蛟死浮出

廣州記晉興郡路側五六里有一物大百圍長數十
丈行者過視則往而不返積年如此失人甚多董奉
從交州出由此嶠見之大驚云此蛇也住行旅施符
敕經宿往看蛇已死矣左右白骨積聚成山

少翁言能致其神

巫者言貴妃可致

漢書李夫人妙麗善舞得幸于武帝及卒上憐憫焉
圖畫其形於甘泉宮上思念不已方士齊人少翁言
能致其神乃夜張燈燭設幃帳陳酒肉令上居他帳
遙望見好女如李夫人之貌還幄坐而步又不得就
視上愈益相思悲感為作詩曰是耶非耶立而望之
偏何姍姍其來遲令樂府諸音家弦歌之上又自為

作賦以傷悼夫人

南史殷淑儀南郡王義宣女帝密取之寵冠後宮假
姓殷氏及薨帝嘗思見之遂為通替棺欲見輒引替
覩屍如此積日形色不異時有巫者能見鬼說帝言
貴妃可致帝大喜令召之有少頃果於帷中見形如
生平帝欲與之言默然不對將執手奄然便歇帝尤
哽恨于是擬李夫人賦以寄意焉

按陳鴻長恨傳玄
宗心念楊妃有道

士自蜀來自言有李少君術玄宗大喜命致其
神與前二事正同其殷與楊並稱貴妃尤異

左慈引鱸魚

介象餌鰒魚

後漢書左慈字元放少有神道嘗在司空曹操坐操

從容顧衆賓曰今日高會珍羞畧備少吳松江鱸魚

耳

神仙傳云松江出好鱸魚味異他處

元放於下坐應曰此可得也因

求銅盤貯水以竹竿餌釣於盤中須臾引一鱸魚出

操大拊掌笑會者皆驚操曰一魚不周坐席可更得

乎放乃更餌釣沈之須臾復引出皆長三尺餘生鮮

可愛操使目前鱸之周浹會者操又謂曰既已得魚恨無蜀中生薑耳元放曰亦可得也操恐其即近所取因曰吾前遣人到蜀買錦可過勅使者增市二端語頃即得薑還并獲操使報命後操使蜀反驗問增錦之狀及時日早晚若符契焉

葛洪神仙傳仙人介象字元則有諸方術吳主聞之徵象到武昌甚敬貴之稱為介君為起宅以御帳給之賜遺前後累千金從象學蔽形之術試還後宮及

出殿門莫有見者又使象作變化種瓜菜百果皆立
生可食吳主共論鱠魚何者最美象曰鮠魚為上吳
主曰論近道魚耳此出海中安可得乎象曰可得耳
乃令人於殿庭中作方塹汲水滿之并求鉤象起餌
之垂綸於塹中須臾果得鮠魚吳王驚喜問象曰可
食否象曰故為陛下取以作生鱠安敢取不可食之
物乃使厨下切之吳王曰聞蜀使來得蜀薑作齏甚
好恨爾時無此象曰蜀薑豈不易得願差所使者可

付直吳主指左右一人以錢五十付之象書一符以著青竹杖中使行人閉目騎杖杖止便買薑訖復閉目此人承其言騎杖須臾止已至成都不知是何處問人人言是蜀市中乃買薑于時吳使張溫先在蜀既於市中相識甚驚便作書寄其家此人買薑畢捉書負薑騎杖閉目須臾已還到吳厨下切鱸適了裴松之曰神仙之術詎可測量臣之臆斷以為惑衆所謂夏蟲不知冷冰耳

佛圖澄識鈴音

由道榮善洞視

晉書劉曜攻洛陽石勒將救之其羣下咸諫以為不可勒以訪佛圖澄澄曰相輪鈴音云秀支替戾岡僕谷劬禿當此羯語也秀支軍也替戾岡出也僕谷劉曜胡位也劬禿當捉也此言軍中捉得曜也又令一童子潔齋七日取麻油合臙脂躬自研於掌中舉手示童子粲然有輝童子驚曰有軍馬甚衆見一人長

大白哲以朱絲縛其肘澄曰此即曜也勒甚悅遂赴洛距曜生擒之

北史由吾道榮隱于琅琊山中辟穀餌松朮茯苓求長生之祕又善洞視蕭軌等之敗于江南其日道榮言之如目見其後鄉人從役得歸者勘問敗時形勢與道榮所說符同

澄公以祝願脫黑略于羗圍

澄公以祝願護弟子于被劫

晉書郭黑略將兵征長安北山羌墮羌伏中時佛圖澄在堂上坐慘然改容曰郭公今有厄乃唱云衆僧祝願澄又自祝願有頃曰脫矣後月餘黑略還自說墮羌圍中東南走馬乏正遇帳下人推馬與之曰公乘此馬小人乘公馬濟與不濟命也略得其馬故獲免推檢時日正是澄祝願時也

又佛圖澄嘗遣弟子向西域市香既行澄告餘弟子曰掌中見買香弟子在某處被劫垂死因燒香祝願

遙救護之弟子後還云某月某日某處為賊所劫垂
當見殺忽聞香氣賊無故自驚曰救兵已至棄之而
走

聖水

聖火

唐書汴宋觀察使令狐楚言亳州聖水出飲者疾輒
愈裴度判曰妖由人興水不自作命在所禁塞又
李德裕傳云聖水獲利人轉相惑德裕在浙西命于

大市集人置釜取其水令取猪肉五斤煮云若聖水也肉當如故逡巡肉熟爛自此人心稍定妖者尋而敗露

南史齊世祖時魏地謠言赤火南流喪南國是歲有沙門從北齋此火而至色赤于常火而微云以療疾貴賤爭取之多得其驗二十餘日都下大盛咸云聖火詔禁之不止火炎至七炷而疾愈吳興丘國賓密以還鄉邑人楊道慶虛疾二十年依法灸即差

神僊之術誕哉

黃白之儔詭哉

申鑒或問神僊之術曰誕哉末之也已矣聖人弗學
非惡生也終始運也短長數也運數非人力之為也
曰亦有僊人乎曰僬僥桂莽產乎異俗就有僊人亦
殊類矣按詩含神霧曰從中州以東西四十萬里
得僬僥國人長一尺五寸也

又或問黃白之儔曰傳毅論之當也燔埴為瓦則可

爍尾為銅則不可以自然驗於不然詭哉敵犬羊之肉以造馬牛不幾矣不其然歟

龜陰故數偶

著陽故數奇

禮三正記曰天子龜長一尺二寸諸侯一尺大夫八寸士六寸龜陰故數偶也天子著長九尺諸侯七尺大夫五尺士三尺著陽故數奇也

非趙龜神而燕龜欺

非秦龜神而趙龜欺

韓非子鑿龜數筴兆曰大吉而以攻燕者趙也鑿龜數筴兆曰大吉而以攻趙者燕也劇辛之事燕無功而社稷危鄒衍之事燕無功而國道絕趙代先得意于燕後得意于齊國亂飾高自以為與秦提衡非趙龜神而燕龜欺也趙又嘗鑿龜數筴而北伐燕將劫燕以逆秦兆曰大吉始攻大梁而秦出上黨矣兵至釐而六城拔矣至陽城秦拔鄴矣龐援前兵而南則

障盡矣臣故曰趙龜雖無遠見于燕且宜近見于秦
秦以其大吉辟地有實救燕有名趙以其大吉地削
兵辱主不得意而死又非秦龜神而趙龜欺也初時
者魏數年東鄉攻盡陶衛數年西鄉以失其國此非
豐隆五行太乙王相攝提六神五括天河殷搶歲星
非數年在西也又非天缺弧逆刑星熒惑奎台非數
年在東也故曰龜筮鬼神不足舉動左右背鄉不足
以專戰然而恃之愚莫大焉

伐紂不信龜凶

伐越不信筮凶

論衡武王伐紂卜之而龜醢占者曰凶太公曰龜醢以祭則凶以戰則勝武王從之卒克紂焉

又魯將伐越筮之得鼎折足子貢占之以為凶何則鼎而折足行用足故謂之凶孔子占之以為吉曰越人水居行用舟不用足故謂之吉魯伐越果克之

司馬季主為賈宋導惑

司馬季主為子陽導僊

史記宋忠賈誼游于卜肆中與司馬季主往復季主
曰今夫卜者導惑教愚也夫愚惑之人豈能以一言
而知之哉言不厭多故騏驥不能與罷驢為駟而鳳
凰不與燕雀為羣而賢者亦不與不肖者同列故君
子處卑隱以辟衆自匿以辟倫微見德順以除羣害
以明天性助上養下多其功利不求尊譽公之等喁
喁者也何知長者之道乎宋忠賈誼忽而自失芒乎

無色悵然噤口不能言于是撮衣而起再拜而辭行
洋洋也出市門僅能自上車伏軾低頭卒不能出氣
真誥黃子陽者魏人也少知長生之妙學道在博洛
山中九十餘年但食桃皮飲石中黃水後逢司馬季
主季主以尊仙八方與之遂以度世

于南陌上伺駕黑牛生

向西北行取乘黑牛人

魏志裴松之注中書令史紀玄龍管輅鄉里人云輅

在田舍嘗候遠隣主人患數失火輅卜教使明日于南陌上伺當有一角巾諸生駕黑牛故車必引留為設賓主此能消之即從輅戒諸生有急求去不聽遂留當宿意大不安以為圖已主人罷入生乃把刀出門倚兩薪積間側立假寐歛有一小物直來過前如獸手中持火以口吹之生驚舉刀砍正斷腰視之則狐自此主人不復有災又華城門夫人者魏故司空涿郡盧公女也得疾連年不差華家時居西城下

南纏里中三廐在其東南管輅卜當有師從東方來
自言能治便聽使之必得其力後無何有南征廐騶
當充甲卒來詣盧公占能治女郎公即表請留之專
使其子將詣華氏療病初用散藥後復用丸治尋有
效即奏除騶名以補太醫

北史有東莞鄭氏執得儼人趙氏尅明晨會宗族當
就墓所刑之趙氏求救于王早早為占候并授以一
符曰君今取還選取七人令一人為行主者佩此符

于鷄鳴時伏在仇家東南二里平旦當有十人相隨
向西北行中有二人乘黑牛一黑牛最在前一黑牛
應第七但捉取第七者將還事必無他趙氏從之果
如其言乃是鄭氏男五父也諸子並為其族所宗敬
故和解二家趙氏竟免

東方朔射覆

管公明射覆

漢書東方朔待詔金馬門稍得親近上嘗使諸數家

射覆置守宮孟下射之皆不能中朔自贊曰臣嘗受
易請射之乃別蓍布卦而對曰臣以為龍又無角謂
之為蛇又有足跂跂胠胠善緣壁是非守宮即蜥蜴
上曰善賜帛十疋復使射他物連中輒賜帛

魏志管輅字公明館陶令諸葛原遷新興太守輅往
祖餞之賓客並會原自起取燕卵逢窠鴛鴦著器中
使射覆卦成輅曰第一物含氣須變依乎宇堂雄雌
以形翅翼舒張此燕卵也第二物家室倒懸門戶衆

多藏精蓄毒得秋乃化此蟲窠也第三物鰕鰯長足吐絲成羅尋網求食利在昏夜此鰕鰯也舉坐驚喜平原太守劉邠取印囊及山鷄毛著器中使筮輅曰內方外圓五色成文含寶守信出則有章此印囊也高岳巖巖有鳥朱身羽翼玄黃鳴不失晨此山鷄毛也清河令徐季龍使人行獵令輅筮其所得輅曰當獲小獸復非食獸雖有爪牙微而不彊雖有文章蔚而不明非虎非雉其名曰狸獵人暮歸果如輅

言李龍取十三種物著大篋中使輅射云器中籍籍有十三種物先說鷄子後道蠶蛹遂一一名之惟以梳為杔耳

賜帛榜百

賞絹杖十

漢書東方朔射覆連中輒賜帛時有幸倡郭舍人滑稽不窮常侍左右曰朔狂幸中耳非至數也臣願令朔覆射朔中之臣榜百不能中臣賜帛廼覆樹上寄

生令朔射之朔曰是窶藪也舍人曰果知朔不能中也朔曰生肉為膾乾肉為脯著樹為寄生盆下為窶藪上令倡監榜舍人

北史吳遵世為齊文襄墨曹參軍從遊山東有雲起恐雨廢射戲使筮遇剝李業興云坤上艮下剝艮為山山出雲故知有雨遵世云坤為地土制水故知無雨文襄使往暹書之云遵世若著賞絹十疋不著罰杖十業興若著無賞不著罰杖十業興曰同是著何

獨無賞文襄曰遵世著會我意故賞須臾雲散二人各受賞罰

蔡鐵卜鼠

客師射鼠

述異記蔡鐵善卜劉義宣射得一白鼠置函中召鐵卜之笑曰兑色之鼠背明戶彎弧射之絕左股鼠孕三雄而兩雌若不見信剖腹而立知公乃使剖鼠腹皆如鐵言

唐索天綱子客師高宗置一鼠於匱令術家射之皆
曰鼠客師曰雖實鼠然入則一出則四發之鼠生三
子

元理知主人果有

趙達知主人酒脯

西京雜記元理善筭每主人果蓏肴蔌悉知其所一
日過友人趙廣漢廣漢為之取酒鹿脯數片元理曰
此資業之廣何供饋之偏耶廣漢慙曰有倉卒客無

倉卒主人元理曰俎上蒸狍一頭厨中荔枝一柈皆可為設廣漢再拜謝臯自入取之盡日為歡

吳志趙達嘗過知故知故為之具食食畢謂曰倉卒乏酒又無佳肴無以叙意如何達因取盤中隻著再三縱橫之乃言卿東壁下有美酒一斛鹿肉三斤何以辭無時坐有他賓內得主人情主人慙曰以卿善射有無欲相試耳竟效如此遂出酒酣飲

知困米石數

知庭棗實數

西京雜記元理嘗從其友人陳廣漢廣漢曰吾有二
囷米忘其石數子為計之元理以食筋十餘轉曰東
囷七百四十九石二升七合又十餘轉曰西囷六百
九十七石八斗遂大署囷門後出米西囷六百九十
七石七斗九升中有一鼠大堪一升東囷不差圭合元理
後歲復過廣漢廣漢以米數告之元理以手擊牀曰
遂不知鼠之殊米不如剝面皮矣

北史綦母懷文每云昔在晉陽為監館館中有一蠕
蠕客同館胡沙門指語懷文云此人別有異算術仍
指庭中一橐樹云令其布算子即知其實數乃試之
并辯若干純赤若干赤白相半于是剥數之惟少一
子算者曰必不少但更撼之果落一實

無用知之

不如不知

管輅別傳輅弟展嘗欲從輅學卜及仰觀事輅言卿

不可教耳夫卜非至精不能見其數非至妙不能觀其道孝經詩論足為三公無用知之也于是遂止子弟無能傳其術者

蜀志杜瓊為人靜默少言闔門自守不與世事蔣琬費禕等皆器重之雖學業入深初不觀天文有所論說後進通儒譙周常問其意瓊答曰欲明此術甚難須當身視識其形色不可信人也晨夜苦劇然後知之復憂漏泄是以不復視也

孫策殺于吉

孫權迎王表

搜神記孫策欲渡江襲許與于吉俱行時大旱所在
燒厲策催諸將士使速引船或身自早出督切見將
吏多在吉所策因此激怒言我為不如于吉耶而先
趨附之便使收吉至呵問之曰天旱不雨道途艱澁
不時得過故自早出而卿不同憂戚安坐船中作鬼
物態敗吾部伍今當相除令人縛置地上暴之使請

雨若能感天日中雨者當原赦不爾行誅俄而雲氣
上蒸膚寸而合比至日中大雨竟至溪澗盈溢將士
喜悅以為吉必見原並往慶慰策遂殺之將士哀惜
共藏其尸天夜忽更興雲覆之明旦往視不知所在
策既殺于吉每獨坐彷彿見吉在左右意深惡之頗
有失常後治創方差而引鏡自照見吉在鏡中顧而
弗見如是再三因撲鏡大叫創皆崩裂湏臾而死

吳志臨海羅陽縣有神自稱王表周旋民間語言飲

食與人無異然不見其形又有一婢名紡績孫權遣
中書郎李崇齋輔國將軍羅陽王印綬迎表表隨崇
俱出與崇及所在郡守令長談論崇等無以易所歷
山林輒遣婢與其神相聞秋七月崇與表至孫權于
蒼龍門外為立第舍數使近臣齋酒食往表說水旱
小事往往有驗及皇后潘氏薨諸將吏數詣王表請
福表亡去 孫盛曰盛聞國將興聽于民國將亡聽
于神權年老志衰讒臣在側廢適立庶以妾為妻可

卷十
謂多涼德矣而偽設符命求福妖邪將亡之兆不亦顯乎

郭景純知命盡日中

皇甫玉知不過日午

晉書王敦將舉兵使郭璞筮之不吉敦大怒曰卿壽幾何曰命盡今日日中敦怒收璞斬之

北史皇甫玉指文宣謂其妻曰殿上者不過二年妻以告舍人斛斯洪慶妻洪慶以啓帝怒曰向婦女小

兒評論萬乘主敕召玉玉每照鏡自言兵死及被召
謂妻曰我今去不迴若過日午時當得活既至正中
遂斬之

文摯怒齊王

華陀怒郃守

呂氏春秋齊王疾瘡使人之宋迎文摯文摯至視王
之疾謂太子曰王之疾必可已也雖然王之疾已則
必殺摯也太子曰何故文摯對曰非怒王則疾不可

治怒王則摯必死太子頓首疆請曰諾請以死爭王
與太子期而將往不當者三齊王固已怒矣文摯至
不解屨登牀履王衣問王之疾王怒而不與言文摯
因出辭以重怒王王叱而起疾乃遂已王大怒不說
將生烹文摯太子與王后急爭之而不能得果以鼎
生烹文摯爨之三日三夜顏色不變文摯曰誠欲殺
我則胡不覆之以絕陰陽之氣王使覆之文摯乃死
後漢華陀傳有一郡守篤病久陀以為盛怒則差乃

多受其貨而不加功無何棄去又留書罵之太守果大怒令人追殺陀不及因瞋恚吐血數升而愈

扁鵲起虢太子

澄公起勒愛子

史記虢太子死扁鵲至虢宮門下問中庶子喜方者曰太子何病國中治穰過於衆事中庶子曰太子病血氣不時交錯而不得泄暴發于外則為中害精神不能正邪氣邪氣蓄積而不得泄是以陽緩而陰急

故暴蹙而死扁鵲曰其死何如時曰鷄鳴至今曰收
乎曰未也其死未能半日也言臣齊勃海秦越人也
家在于鄭未嘗得望精光侍謁于前也聞太子不幸
而死臣能生之子以吾言為不誠試入診太子嘗聞
其耳鳴而鼻張循其兩股以至于陰當尚溫也中庶
子聞扁鵲言目眩然而不瞋舌橋然而不下乃以扁
鵲言入報虢君虢君聞之大驚出見扁鵲于中闕因
噓唏服臆魂精泄橫流涕長潛忽忽承眖悲不能自

止容貍變更扁鵲曰若太子病所謂尸蹙者也扁鵲
乃使弟子子陽厲鍼砥石以取外三陽五會有間太
子蘇乃使子豹為五分之熨以八減之齊和煮之以
更熨兩脇下太子起坐更適陰陽但服湯二旬而復
故故天下盡以扁鵲為能生死人扁鵲曰越人非能
生死人也此自當生者越人能使之起耳

晉書石勒愛子斌暴病死將殯勒歎曰朕聞號太子
死扁鵲能生之今可得效乎乃令告佛圖澄澄取楊

枝沾水灑而呪之就執斌手曰可起矣因此遂蘇有
頃平

飲上池水盡見五臟癥結

受青囊書遂洞五行天文

史記扁鵲少時為人舍長舍客長桑君過扁鵲獨奇
之常謹遇之長桑君亦知扁鵲非常人也出入十餘
年乃呼扁鵲私坐間與語曰我有禁方年老欲傳與
公公母泄扁鵲曰敬諾乃出其懷中藥予扁鵲飲是

以上池之水三十日當知物矣乃悉取禁方盡與扁鵲忽然不見殆非人也扁鵲以其言飲藥三十日視見垣一方人以此視病盡見五臟癥結特以診脈為名耳

晉書有郭公者客居河東精于卜筮璞從之受業公以青囊中書九卷與之由是遂洞五行天文卜筮之術禳災轉福通致無方雖京房管輅不能過也郭璞門人趙載嘗竊青囊書未及讀而為火所焚

斷截腸胃既而縫合

引出臟腑還內腹中

後漢華佗精于方藥處劑不過數種心識分銖不假
稱量針灸不過數處裁七八九若疾發結于內針藥
所不能及者乃令先以酒服麻沸散既醉無所覺因
剗破腹背抽割積聚若在腸胃則斷截湔洗除去疾
穢既而縫合傳以神膏四五日創愈一日之間皆平
復

晉書佛圖澄嘗齋時平旦至流水側從腹旁孔中引出五臟六腑洗之訖還內腹中

作湯二升再服

取蘇一升煮服

後漢書華佗傳廣陵太守陳登忽患胸中煩懣面赤不食佗脈之曰府君胃中有蟲欲成內疽腥物所為也即作湯二升再服須臾吐出三升許蟲頭赤而動半身猶是生魚膾所苦便愈佗曰此病後三期當發

遇良醫可救登至期疾動時佗不在遂死

南史褚澄善醫術建元中為吳郡太守百姓李道念以公事到郡澄見謂曰汝有重疾荅曰舊有冷疾至今五年衆醫不差澄為診脈謂曰汝病非冷非熱當是食白淪雞子過多所致今取蘇一升煮服之始一服乃吐出一物如升涎裏之動開看是雞雛羽翅爪距具足能行走澄曰此未盡更服所餘藥又吐得如向者鷄十三頭而病都差當時稱妙

華元化療咽塞

徐文伯療髮癥

後漢書華佗字元化嘗行道見有病咽塞者因語之
曰向來道隅有賣餅人并蠶甚酸可取三升飲之病
自當去即如佗言立吐一蛇乃懸車而候佗時佗小
兒戲于門中逆見自相謂曰客車邊有物必是逢我
翁也及客進顧視壁北懸蛇以十數乃知其奇

南史宋明帝宮人患腰痛牽心每至輒氣欲絕衆醫

以為肉癥徐文伯曰此髮癥以油投之即吐得物如髮稍引之長三尺頭已成蛇能動挂門上滴盡一髮而已病都差

華元化針死胎

徐文伯針雙胎

後漢書有李將軍者妻病呼佗視脈佗曰傷身而胎不去將軍言間日實傷身胎已去矣佗曰按脈胎未去也將軍以為不然妻稍差百餘日復動更呼佗佗

曰胎理如前似兩胎先生者去血多故後兒不得出也胎既已死血脈不復歸必燥著母脊乃為下針并令進湯婦因欲產而不通佗曰死胎枯燥勢不自生使人探之果得死胎人形可識但其色已黑

南史宋後廢帝出樂游苑門逢一婦人有娠帝亦善診診之曰此腹是女也問徐文伯曰腹有二子一男一女男左邊青黑形小于女帝性急便欲使剖文伯惻然曰若刀斧恐其變異請針之立落便瀉足太陰

補手陽明胎便應針而落兩兒相續出如其言

水灌滿百數

水澆盡百斛

華佗別傳有婦人長病經年世謂寒熱注病者冬十一月中佗令坐石槽中平旦用冷水汲灌云當滿百始七八灌會戰欲死灌者懼欲止佗令滿數將至八十灌熱氣乃蒸出囂囂高三三尺滿百灌佗乃使然火溫床厚覆良久汗洽出著粉汗燥便愈

南史直閣將軍房伯玉服五石散十許劑無益更患
冷夏日常複衣徐文伯為診之曰卿伏熱應須以水
發之非冬月不可至十一月冰雪大盛令二人夾捉
伯玉解衣坐石取冷水從頭澆之盡二十斛伯玉口
噤氣絕家人啼哭請止嗣伯遣人執杖防閤敢有諫
者撻之又盡水百斛伯玉始能動而見背上彭彭有
氣俄而起坐曰熱不可忍乞冷飲嗣伯以水與之一
飲一升病都差自爾恒發熱冬月猶單禪衫體便肥

壯

為氣徙癰

作氣出鏃

南史薛伯宗善徙癰疽公孫泰患背伯宗為氣封之
徙置齋前柳樹上明旦癰消樹邊便起一瘤如拳大
稍稍長二十餘日瘤大膿爛出黃赤汁斗餘樹為之
萎損

又陳顯達與桂陽賊戰矢中左目而鏃不出地黃村

潘嫗善禁先以釘釘柱嫗禹步作氣釘即出乃禁顯達目中鏃出之

服雄黃吐誤食之髮

熏防風療不語之證

舊唐書時有尼明律年六十餘患心腹鼓脹身體羸瘦已經二年甄立言診脈曰其腹內有蟲當是誤食髮為之耳因令服雄黃須臾吐一蛇如人手小指唯無眼燒之猶有髮氣其疾乃愈

又許肩宗初事陳為新蔡王外兵參軍時柳太后病風不言名醫治皆不愈脈益沈而噤肩宗曰口不可下藥宜以湯氣熏之令藥入腠理周理即差乃造黃耆防風湯數十斛置於牀下氣如煙霧其夜便得語誑語療疑病

權誑療眼花

北夢瑣言元頑博士話唐時中表間有一婦人從夫南中效官曾誤食一蟲嘗疑之由是成疾頻療不損

京城醫者忘其姓名知其所患乃謂主人姨妳中謹
密者一人預戒之曰今以藥吐瀉但以盤盂盛之當
吐之時但言有一小蝦蟆走去然不得令娘知之是
誑語也其妳僕遵之此疾永除

又有一年少眼中嘗見一小鏡子醫工趙卿胗之與
少年期來晨以魚鱸奉候少年及期赴之延于閣子
內且令從容俟客退後方得攀接俄而設臺于上施
一甌芥醋更無他味御亦未出迨禺中久候不至少

年饑甚且聞醋香不免輕啜之逡巡又啜之覺胸中豁然眼花不見因竭甌啜之趙卿探知方出少年以啜醋慙謝卿曰郎君喫鱠太多醬醋只欲郎君因饑以啜之果愈此疾烹鱗之會乃權誑請退謀餐

龍化為老翁求治

鬼請為芻人求療

山川紀異龍背生疽化老翁求治於孫登曰病痊當有報時天旱不數日果大雨大石上忽裂一井其水

湛然

南史徐秋夫仕至射陽令常夜有鬼呻聲甚悽愴秋夫
問何須答曰姓某家在東陽患腰痛死雖為鬼痛猶
難忍請療之秋夫曰云何厝法鬼請為芻人按孔穴
針之秋夫如言為灸四處又針肩井三處設祭埋之
明日見一人謝恩忽然不見當世伏其通靈

治病龍

出懶龍

山川紀異湯陰西有真人杜舊傳孫登寓此值旱衆
禱于龍得雨將祭謝之登曰此病龍雨安能蘇禾稼
弗信請嗅之水果腥穢龍時背生疽聞登言化老翁
求治曰病痊當有報不數日果大雨大石上忽裂一
井其水湛然蓋龍穿此以報也

高僧傳什僧伽閒而宴息見神告曰天方亢陽百姓
苗死身胡藏其懶龍耶伽曰為之柰何神曰若今夕
旦小指出窻隙外其如人何伽依之其夜霆擊異常

質明視指微有紅線脉焉

黥布刑而王

昭達耿而貴

史記黥布秦時為布衣少年有客相之曰當刑而王
及壯坐法黥布欣然笑曰人相我當刑而王幾是乎
人有聞者共俳笑之及項王封諸將立布為九江王
南史韋昭達性倜儻輕材尚氣少時遇相者謂曰卿
容貌甚善須小虧則當富貴梁大同中昭達為東宮

直後因醉墮馬鬚角小傷昭達喜之相者曰未也侯
景之亂昭達率鄉人援臺為流矢所中耿其一目相
者見之曰卿相善矣不久當富貴臺城陷昭達還鄉
里與陳文帝游因結君臣分侯景平文帝為吳興太
守昭達杖策來謁文帝見之大喜委以將帥恩寵超
于儕等

三君皆丞相

三人皆方伯

史記有善相工田文者與韋丞相賢魏丞相邴丞相吉微賤時會于客家田文言曰今此三君者皆丞相也其後三人竟更相代為丞相

南史沈攸之賤時與吳郡孫超之全景文共乘一小船出都三人共上引埭有一人止而相之曰君三人皆當至方伯攸之曰豈有是事相者曰不驗便是相書誤耳後攸之為郢荆三州超之廣州刺史景文南豫州刺史

鉗徒相衛青貴至封侯

相工指倪寬秩至三公

論衡衛青父鄭季與陽信公主家僮衛媼通生青在建章宮時鉗徒相之曰貴至封侯青曰人奴之道得不笞罵足矣安敢望封侯其後青為軍吏戰數有功超封增官遂為大將軍封為萬戶侯

又韓太傅為諸生時借相工五十錢與之俱入壁雍之中相壁雍弟子誰當貴者相工指倪寬曰彼生當

貴秩至三公韓生謝遣相工通刺倪寬結膠漆之交
盡筋力之敬徒舍從寬深自附納之寬常甚病韓生
養視如僕役恩深踰于骨肉後名聞于天下倪寬位
至御史大夫州郡承旨召請擢用舉在本朝遂至太
傅 夫鉗徒許負及相鄧通倪寬之工可謂知命之
工矣故知命之工察骨體之證睹富貴貧賤猶人見
盤盂之器知所設用也善器必用貴人惡器必施賤
者尊鼎不在陪廁之側瓠瓜不在堂殿之上明矣

衛仲卿以人奴而具封侯相

薛大鼎以人奴而具方岳相

漢書衛青字仲卿嘗從人至甘泉居室有一鉗徒相
青曰貴人也官至封侯青笑曰人奴之生得無笞罵
即足矣安得封侯事乎

舊唐書初泗州刺史薛大鼎隋時嘗坐事沒為奴貞
觀初與數人詣乙弗弘禮大鼎次至弘禮曰君奴也
欲何所相咸曰何以知之弘禮曰觀其頭目直是賤

人但不知餘處何如耳大鼎有慚色乃解衣視之弘
禮曰看君面不異前言占君自腰已下當為方岳之
任

折臂三公

折臂太守

晉書羊祜傳有善相墓者言祜祖墓所有帝王氣若
鑿之則無後祜遂鑿之相者見曰猶出折臂三公而
祜竟墮馬折臂位至公而無子

南史初劉之遴在荆府常寄居南郡忽夢前太守袁
彖謂曰卿後當為折臂太守即居此中之遴後牛奔
墮車折臂右手偏直不復得屈伸書則以手就筆歎
曰豈黥而王乎周捨嘗戲之曰雖復並坐可橫政恐
陋蒼無枕後連相兩王再為此郡

相裴冕以兵起得相

相呂諲須大驚得相

舊唐書裴冕為祠部郎中知河西留後在武威金梁

鳳謂冕曰玄象有變半年間有兵起郎中此時當得
中丞不拜中丞即宰相不離天子左右大富貴冕曰
公乃狂言冕何至此梁鳳曰有一日向東京一日入
西蜀一日來向朔方此時公得相冕懼其言深謝絕
之其後安祿山反南犯洛陽僭稱偽位哥舒翰東守
潼關累月奏冕為御史中丞追赴京冕又詰曰事驗
矣冕又問三日之兆梁鳳曰東京日即自磨滅蜀川
日亦不能久此間日何轉分明不可說冕志之即潼

關失守玄宗幸蜀肅宗北如靈武冕會之勸成冊立
改元為至德元年冕果為中書侍郎平章事

又金梁鳳在河隴謂呂諲曰判官骨相合得宰相須
得一大驚怖即得諲後至驛責讓驛長榜之驛吏武
將性麤猛持弓矢突入射諲矢兩發幾中諲面諲踰
牆得免以報梁鳳梁鳳曰此必入相逾年諲自黃門
侍郎知政事

摸人而知其相

摸書而知其字

北史皇甫玉善相術齊文宣故以巾袜其眼使歷摸
知人至文宣曰此最大達官于任城王曰當至丞相
于常山長廣二王並曰亦貴至石動桶曰此弄癡人至
二供膳曰正得好飲食而已

又盧太翼博綜羣書其後目盲以手摸書而知其字
朱建平善相人

朱建平善相馬

魏志朱建平善相術于閭巷之間效驗非一太祖為
魏公聞之召為郎文帝為五官將坐上會之三十餘
人文帝問己年壽又令徧相衆賓建平曰將軍當壽
八十至四十時當有小厄願謹護之謂夏侯威曰君
四十九位為州牧而當有厄厄若得過可年至七十
致位公輔謂應璩曰君六十二位為常伯而當有厄
先此一年當獨見一白狗而旁人不見也謂曹彪曰
君據藩國至五十七當厄于兵宜善防之初潁川荀

攸鍾繇相與親善攸先亡子幼繇經紀其門戶欲嫁
其妾與人書曰吾與公達會共使朱建平相建平曰
荀君雖少然當以後事付鍾君吾時啁之曰惟當嫁
阿鶩耳何當此子竟遭隕沒戲言遂驗乎今欲嫁阿
鶩使得善處追思建平之妙雖唐舉許負何以復加
也文帝黃初七年年四十病困謂左右曰建平所言
八十謂晝夜也吾其決矣頃之果崩夏侯威為兗州
刺史年四十九十二月上旬得疾念建平之言自分

必死豫作遺令及送喪之備咸使素辦至下旬轉差垂以平復三十日日昃請紀綱大吏設酒曰吾所苦漸平明日鷄鳴年便五十建平之戒真必過矣威罷客之後合瞑疾動夜半遂卒璩六十一為郎中直省內歛見白狗問之衆人悉無見者于是數聚會并急游觀田里飲宴自娛過期一年六十三卒曹彪封楚王年五十七坐與王凌通謀賜死

又朱建平善相馬文帝將出取馬外入建平道過之

語曰此馬之相今日死矣帝將乘馬馬惡衣香驚趨
文帝膝帝大怒即便斬之

相馬

相牛

呂覽古之善相馬者寒風是相口齒麻朝相頰子女
厲相目衛忌相髭許鄙相脰投伐褐相胃脇管青相
臄物陳悲相股腳秦牙相前贊君相後凡此十人者
皆天下之良工也其所以相者不同以用見馬之一

徵也而知節之高卑足之滑易材之堅脆能之長短
非獨相馬然也人亦有徵

酉陽雜俎相牛法岐胡有壽膺匡欲廣毫筋欲橫蹄
後筋也常有聲有黃也角冷有病旋毛在珠泉無壽
睫亂觸人銜烏角偏妨主毛少骨多有力溺射前良
牛也踈肋難養

相印

相板

相笏

魏氏春秋云許允之出為鎮北也喜謂其妻曰吾知免矣妻曰禍見於此何免之有允善相印將拜以印不善使更刻之如此者三允曰印雖始成而已被辱問送印者果懷之而墜之于廁相印書曰相印法本出陳長文長文以語韋仲將印工楊利從仲將受法以語許士宗利以法術占吉凶十可中八九仲將問長文從誰得法長文曰本出漢世有相印相笏經又有鷹經牛經馬經印工宗養以法語程申伯是故有

一十二家相法傳於世

南史庾道愍精於相板采明帝時山陽王休祐屢以言語忤顏見道愍託以己板為他物令道愍占之道愍曰此乃甚貴然使人多愆忤休祐以褚彥回詳密求換其板他日彥回侍明帝自稱下官帝多忌甚不悅休祐具以狀言帝意乃解又綦母珍之在西州時有一手板相者云當貴每以此言勸帝又圖黃門郎帝嘗問之曰西州時手板何在珍之曰此是黃門

手板官何須問

南部新書有李參軍者善相筭知休咎必驗呼為李相筭又有龍復本者無目凡有象簡竹筭以手捻之必知官祿年壽

周宣相夢

趙直占夢

魏志周宣為郡吏太守楊沛夢人曰八月一日曹公當至必與君杖飲以樂酒使宣占之是時黃巾賊起

宣對曰夫杖起弱者藥治人病八月一日賊必除滅
至期賊果破 文帝問宣曰吾夢殿屋兩瓦墮地化
為雙鴛鴦此何謂也宣對曰後宮當有暴死者帝曰
吾詐卿耳宣對曰夫夢者意耳苟以形言便占吉凶
言未畢而黃門令奏宮人相殺帝復問曰我昨夜夢
青氣自地屬天宣對曰天下有貴女子冤死是時帝
已遣使賜甄后璽書聞宣言而悔之遣人追賜者不
及 帝復問曰吾夢摩錢文欲令滅而更愈明此何

謂耶宣悵然不對帝重問之宣對曰此自陛下家事
雖意欲爾而太后不聽是以文欲滅而明耳時帝欲
治弟植之罪偏于太后但加貶爵以宣為中郎屬太
史 嘗有問宣曰吾昨夜夢見芻狗其占何也宣荅
曰君欲得美食有頃出行果遇豐膳後又問宣曰昨
夜復夢見芻狗何也宣曰君宜墮車折脚宜戒慎之
頃之果如宣言後又問宣昨夜復夢見芻狗何也宣
曰君家欲失火當善護之俄遂火起語宣曰前後三

時皆不夢也聊試君耳何以皆驗耶宣曰此神靈動
君使言故與真夢無異也又問宣三夢芻狗而其占
不同何也宣曰芻狗者祭神之物故君始夢當得飲
食也祭神即訖則芻狗為車所轆故中夢當墮車折
脚也芻狗既車轆之後必載以為樵故後夢憂失火
也

蜀志魏延夢頭上生角以問占夢趙直直詐延曰夫
麒麟有角而不用此不戰而賊欲自破之象也退而

告人曰角之為字刀下用也刀下用刀其凶甚矣

蔣琬見推之後夜夢有一牛頭在門前流血滂沱意甚惡之呼問直直曰夫見血者事分明也牛角及鼻公字之象君位必當至公大吉之徵也 蜀志注何祇嘗夢井中生桑以問直直曰桑非井中之物會當移植然桑字四十八君壽恐不過此祇笑言得此足矣後為犍為郡年四十八卒如直所言

射龍

屠龍

尸子韓雉見申羊于魯有龍飲于沂韓雉曰吾聞也
出見虎搏之見龍射之今弗射是不得行吾聞也遂
射之

莊子朱泚漫學屠龍于支離益單千金之家三年技
成而無所用其巧

射梅

射蔗

南史柳惲嘗與瑯琊王瞻博射嫌其皮濶乃摘梅帖
烏珠之上發必命中觀者驚駭

濟書宜都王銓善射常以棚的大濶曰終日射候何
難之有乃取甘蔗挿地百步射之十發十中

養由基射猿

養由基射蜻

呂覽荆王有神白猿王自射之則搏樹而嬉使養由
基射之始調弓矯矢未發猿擁樹而號

尸子楚莊王命養由基射蜻蛉曰吾願生得養由基
援弓射之拂左翼

曹丕善左右射

董卓善左右射

典略文帝自叙曰尚書令荀彧奉使犒軍見余談論
之末或言聞君善左右射此實難能余言執事未覩
夫項發口縱俯馬蹄而仰月支也或喜笑曰乃爾余
曰埒有常徑的有常所雖每發輒中非至妙也若馳

平原赴豐草要狡獸截輕禽使弓不虛彎所中必洞
斯則妙矣

魏志董卓有才武膂力少比雙帶兩韃左右馳射

二狐俱獲

雙鴈俱落

南史山強工騎射彎弓五石為奏事中散從獻文獵
方山有兩狐起于御前詔強射之百步內二狐俱獲
北史斛律光以庫直事文襄從出野見鴈雙飛來文

襄使光馳射之以二矢俱落焉

二箭下雙鷗

一發貫二鷗

後魏秦王翰弟幹善弓馬以馳從明元于白登之東
北有雙鷗飛鳴于上帝命左右射之莫能中鷗旋飛
稍高幹以二箭下雙鷗

南史突厥攝固獨愛長孫晟每共游獵留之竟歲嘗
有二鷗飛而爭肉固以箭兩隻與晟請射取之晟馳

往遇雕相攫遂一發雙貫焉攝圖喜命諸子弟貴人
皆相親友冀昵近之以學彈射

見二鹿授箭

見雙鳧授弓

北史介朱榮曾送臺使見二鹿授兆二箭令取供今
食遂構火以待之俄而兆獲其一榮欲誇使人責兆
不盡取杖之五十 又尉遲綱嘗從周文北狩雲陽
見五鹿俱走綱獲其三

又賀拔勝從宴昆明池時有雙鳬游池上周文授弓矢于勝曰不見公射久矣請以為歡勝射之一發俱中因拜曰使勝得奉神武以討不庭皆此類也又魏孝武即位蠕蠕等諸蕃並遣使朝貢帝臨軒宴之有鵠飛鳴于殿前帝素知竇熾善射因欲矜示遠人乃給熾御箭兩隻命射之鵠乃應弦而落諸蕃人咸歎異焉帝大悅

落鵠都督

射鵰都將

北齊書斛律光嘗從世宗于洹橋校獵見一大鳥雲
表飛颺光引弓射之正中其頸此鳥形如車輪旋轉
而下至地乃大鵬也世宗取而觀之深壯異焉丞相
屬邢子高見而歎曰此射鵰手也當時傳號落鵰都
督

後魏書秦王翰弟幹善弓馬以騎從明元于白登之
東北有雙鵰飛鳴于上帝命左右射之莫能中鵰旋

飛稍高幹以二箭下雙鷗帝賜之御馬弓矢以旌其
能軍中于是號幹為射鷗都將

畫維摩神光滿室

畫釋迦視之如生

尉遲偓金陵六朝記顧愷之于瓦官寺畫維摩神光
滿室累日方散

又王定之于白馬寺畫釋迦像視之如生

誤落筆因畫為蠅

誤落墨因作駁牛

尉遲偓金陵六朝記曹不興亦烏元年游青溪見赤
龍凌波面而出乃走筆圖之藏于祕閣是歲大旱乃
出龍祭之則甘雨霽霈又為吳王畫屏風誤落筆因
畫為蠅吳王以袂拂之不去方悟焉又寫葛仙公真
容世傳之按吳錄云曹不興善畫權使畫屏風誤
落筆點素因就以作蠅既進御權以為生蠅舉手彈
之

又王致之為桓溫畫扇悞落墨因作駁牛甚妙

宿其下十日

宿其傍三日

隋唐嘉話閻立本家代善畫至荊州張僧繇見之曰
定虛得名耳明日更往曰名下定無虛士坐卧觀之
留宿其下十日不能去

又率更令歐陽詢行見古碑索靖所書駐馬觀之良
久而去數百步復還下馬佇立疲則布毯坐觀因宿

其傍三日而後去

閻立本悔畫

陸鴻漸毀茶

舊唐書閻立本善圖畫工于寫真秦府十八學士圖
及貞觀中凌煙閣功臣圖並立本之跡也時人咸稱
其妙太宗嘗與侍臣學士泛舟于春花池中有異鳥
隨波容與太宗擊賞數賜詔座者為詠召立本令寫
焉時閣外傳呼云畫師閻立本時已為主爵郎中奔

走流汗俯伏池側手揮丹粉瞻望座賓不勝媿赧退
誠其子曰吾少好讀書幸免面牆緣情染翰頗及儕
流惟以丹青見知躬役之務辱莫大焉汝宜深誠勿
習此末伎立本為性所好欲罷不能也及為右相與
左相姜恪對掌樞密恪既歷任將軍立功塞外立本
惟善于圖畫非宰相之器故時人以千字文語曰左
相宣威沙漠右相馳譽丹青

唐書陸羽字鴻漸性嗜茶著經三篇言茶之原之法

之具尤脩天下益知飲茶矣時鬻茶者至陶羽形置
煬突間祀為茶神有常伯熊者因羽論復廣著茶之
功御史大夫李季卿宣慰江南次臨淮知伯熊善煮
茶召之伯熊執器前季卿為再舉杯至江南又有
薦羽者召之羽衣野服挈具而入季卿不為禮羽愧
之更著毀茶論其後尚茶成風時回紇入朝始驅馬
市茶

魏文帝善彈碁

王僧虔善累棊

博物志魏文帝善彈棊能手巾角時有一書生又能低頭以所著葛巾角擲棊世說曰彈棊始自魏宮內妝奩戲也文帝于此技亦特好有客自云能帝使為之妙踰于帝

南史王僧虔累十二博棊既不墜落亦不重作

拾子如龍鳳形

下子成一首詩

酉陽雜俎昔鳩摩羅什與人碁拾敵死子空處如龍
鳳形

碁天洞覽王勃圍碁率下四子成一首詩勃猶詫之
向人曰吾目奪造化雖一時之間百用亦可

捶鉤者非鉤無察

承蜩者唯蜩之知

莊子大馬之捶鉤者年八十矣而不失毫芒大馬曰
子巧與有道與曰臣有守也臣之年二十而好捶鉤

于物無視也非鉤無察也是用之者假不用者也以
長得其用而況乎無不用者乎物孰不資焉 注曰
大馬大司馬也江東三魏之間謂鍛為捶鉤劍名

又仲尼適楚出于林中見痾僂者承蜩猶掇之也仲
尼曰子巧乎有道耶曰我有道也吾六月累丸二而
不墜則失者錙銖累三而不墜則失者十一累五而
不墜猶掇之也吾處身也若厥株拘吾執臂也若槁
木之枝雖天地之大萬物之多而唯蜩翼之知吾不

反不側不以萬物易蜩之翼何為而不得孔子顧謂弟子曰用志不分乃凝于神其痾僂丈人之謂乎

偃師所造倡者

馬鈞所作木人

列子周穆王西巡狩越崑崙不至弇山反還未及中國道有獻工人名偃師穆王薦之問曰若有何能偃師曰臣惟命所試然臣已有所造願王先觀之穆王曰日以俱來吾與若俱觀之翌日偃師謁見王王薦

之曰若與偕來者何人耶對曰臣之所造能倡者穆
王驚視之趣步俯仰信人也巧夫領其頤則歌合律
捧其手則舞應節千變萬化惟意所適王以為實人
也與盛姬內御並觀之技將終倡者瞬其目而招王
之左右侍妾王大怒立欲誅偃師偃師大懼立剖散
倡者以示王皆傳會革木膠漆白黑丹青之所為王
諦料之內則肝膽心肺脾腎腸胃外則筋骨肢節皮
毛齒髮皆假物也而無不畢具者合會復如初見王

試廢其心則口不能言廢其肝則目不能視廢其腎則足不能步穆王始悅而歎曰人之巧乃可與造化者同功乎詔貳車載之以歸

魏志注人有上百戲者能設而不能動也帝以問馬鈞可動否對曰可動帝曰其巧可益否對曰可益受詔作之以大木彫構使其形若輪平地施之潛以水發焉設為女樂舞象至今木人擊鼓吹簫作山岳使木人跳丸擲劍緣絙倒立出入自在百官行署春磨

鬪雞變巧百端

評曰倡者假矣誰知已之百骸九竅盡假也木人幻矣誰知已之聲音笑貌

悉幻也彼妄認四大為自身相六塵緣影為自心相者豈認幻化人亦真人耶

魯般刻木為仙

魯般刻木為鶴

酉陽雜俎魯般燉煌人未詳年代巧侔造化嘗作木
為其父乘之至吳會吳人以為妖殺之般怨吳人殺
其父于肅州城南作一木仙人舉手指東南吳地大
旱三年人曰般所為也于是賣物巨千謝之般為斷

其一手其月吳中大雨唐初工人尚祈禱其木仙

述異記天姥山南峯昔魯般刻木為鶴一飛七百里
後放于北山西峯上漢武帝使人往取之遂飛上南
峯往往天將雨則翼翅動搖若將飛奮

墨子為鳶一日而敗

公輸為鵲三日不下

韓子墨子為木鳶三年而成蜚一日而敗弟子曰先
生之巧至能使木鳶飛墨子曰不如為車輓者巧也

用咫尺之木不費一日之事而引三十石之任致遠
力多久于歲數今我為鳶三年成蜚一日而敗惠子
聞之曰墨子大巧巧為輓拙為鳶

墨子公輸子削竹木以為鵲成而飛之三日不下公
輸子自以為至巧子墨子謂公輸子曰子之為鵲也
不如翟之為車轄須臾斷三寸之木而任五十石之
重故所為巧利于人謂之巧不利于人謂之拙

三年而成楮葉

三年而成畫莢

列子宋人有為其君以玉為楮葉者三年而成鋒殺莖柯毫芒繁澤亂之楮葉中而不可別也此人遂以巧食宋國子列子聞之曰使天地之生物三年而成一葉則物之有葉者寡矣故聖人恃道化而不恃智巧

韓子客有為周君畫莢者三年而成君觀之與絲莢者同狀周君大怒畫莢者曰築十版之牆鑿八尺之

牖而以日始出時加之其上而觀周君為之望見其
狀盡成龍蛇禽獸車馬萬物之狀備具周君大悅畫
茨之功非不微難也然其用與素髹茨同

羽人乘蠡舟

越王銅船

神人乘漆舟


廩君土船

拾遺記秦始皇好神仙有羽人乘蠡舟浮黑水而至
者身長十丈編毛為衣兩目如電方耳出于項間顏
如童稚

三秦記太虛山上有池神人常乘漆船于其內今有故漆船在焉

交州記安定縣有越王銅船潮退則見又陰雨日百姓樵採見銅船出水上

載記廩君之先五姓爭之乃以土為船雕畫之而浮水中曰若其船浮存者以為廩君務相船獨浮于是遂稱廩君乘其土船將其從卒當夷水而下



駢志卷十